

Gion Deplazes tira natiers in bel public

Colloqui a l'Universitad da Turitg

■ (anr/vi) Cun ses 91 onns attira l'autur Gion Deplazes anc adina in bel publicum. Il mardi saira è la stanza, nua ch'il colloqui rumantsch a l'Universitad a Turitg ha adina lieu, stada bain plaina. Per il solit na beneventa *Mevina Puorger* betg tanta glied als colloquis. Ma il hosp da quest'emna ha fascinà ses lecturs durant sis decennis cun raquints, romans e poesias. Perquai ha ina bella raspada da Rumantschs en la Bassa profità da la chaschun da pudair dudir anc ina giada il grond maister da la prosa sursilvana.

Il public ha dentant stuì sa cuntentar cun mo paucs tocs prelegids ord la nova ovra «Viers autras rivas», pertge Puorger ha er envidà *Felix Giger* ed *Arnold Spescha*, che han raquintà co ch'els han lectorà ed edì l'ovra.

Savurà gia d'uffant l'odur da ragischs

«Sia ovra è in omagi ad ina regiun», ha preschentà Puorger l'autur. Sias figuras litteraras sajan stadas inventadas uschia ch'ins haja adina pudì s'imaginar ch'ellas pudessan esser realas. Deplazes haja lavurà sco autur sin trais champs: Sco scienzià che ha perscrutà las biografias dals scripturs sursilvans, sco autur da las «Funtaunas» davart l'istorgia da la litteratura rumantscha e sco scriptur da poesias, dramas e prosa.

Romans sco «Lezvas petras» u il «Il caver da Vigliuz» hajan ina gronda valur etnologica, pertge els raquintian dal brischar vinars u da la vita da pasturs sco ella era pli baud. Deplazes ha laschè udir il public a Turitg ina curta sequenza da «Treis dis cavaragischs ella Greina»: Dus giuven van per l'emprima giada a chavar ragischs-giansauna. L'emprim èsi plitost in stgavar e stranglar, uschia che las «litgivas» respectivamain las ragischs sagitlias cun il suc per il vinars stgarpan e



Da buna luna suenter il colloqui: Felix Giger, Mevina Puorger, la persuna principala Gion Deplazes ed Arnold Spescha. FOTO C. CADRUVI

restan en il terratsch. Ma lura mussa l'aug Testa co ch'ins sto schlucar il terren per pudair tiers l'entira ragisch cun tut sias sromaziuns.

Suenter la prelecziun ha l'autur tradì ch'el saja creschì si en ina famiglia cun plirs umens che gievan a chavar ragischs. Gia cun tschintg onns haja el observà co ses tat brischavia vinars ed haja sentì l'odur da las ragischs-giansauna. Da lez temp anc tuts che dastgavan brischar vinars a chasa, fin ch'ins ha scumandà ils onns trenta als privats da destillar.

Lavur cumina da trais corifeas da lingua

«Viers autras rivas» è il 14avel tom da l'ovra cumplexiva da *Gion Deplazes*. Arnold Spescha e Felix Giger, omadus sez auturs rumantschs, han purschè agid cun lectorar ed edir quest ultim tom. L'emprim haja Deplazes gi l'idea da far dus toms cun il material che cumpiglia er ina ritscha da poesias. Ma lura hajan ins decidì dad edir sulet in tom.

«Igl è stà lavur cumina», ha ditg Giger davart las discussiuns sur dal cuntegn

ed ils detagls linguistics. «Nus avain respectà il stil e la noda-chasa da Gion Deplazes», ha explitgà Spescha. Ina spezialitad da Deplazes sajan ses dialogs ch'el legia giu da la bucca a la glied. «El vesa tut ed auda tut», ha ludà Spescha il dun dad observar da l'autur. «Anc oz ha el ina memoria sco in chaval, cumpareglia cun la mia ch'è sco in chaz furà.»

Giat u gat?

In pitschen intermezzo – che ha cuzzà strusch ina minuta durant il colloqui –

ha mussà il suandant: Era sche duas corifeas da lingua sco Spescha e Giger edesch e lectoreschan in'ovra, pon capitar incaps.

Il titel d'ina poesia en il nov cudesch è «Tut pil gat». Tenor il vocabulari tudestg-sursilvan da Vieli/Decurtins è quest titel correct ed i na dess nagut da crititgar. Tuttina ha Deplazes marmugnà insatge, cura ch'el ha avri ses cudesch e legì il titel. Pertge? A Surrein na datti naging «gats», i dat mo «giats».

La piculezza illustrescha: Sch'i va per regionalissem charezads pon auturs rumantschs avair testas pulit diras. Els n'èn betg adina pronts da laschar reger e da sa suttametter a l'autorità d'in lectorat ed al dictat d'in vocabulari – betg sch'i va per las bellas atgnadads regionalas e gnanca per posta d'in giat.

Gion Deplazes: «Viers autras rivas». Ediziun ovras Laax. 335 paginas. 25 francs. Cuira. 2009.

■ CHAM

Ernst Bromeis visita l'URB

(anr/vi) Questa saira raquinta *Ernst Bromeis* a Cham (ZG) da sias aventuras. L'Uniun dals Rumantschs da la Bassa (URB) envida tuts interessads a questa sairada. Bromeis è creschì si ad Ardez, è stà scolast primar, trenader da sportists d'elita e redactur tar il Radio Rumantsch. La stad passada è Bromeis nudà tras 200 lais dal Grischun. Da questa experientscha raquinta el questa saira e mussa fotografias dals lais da muntogna ch'el ha tranudà. L'occurrenza cumenza a las 19.30 en la sala Lorzen a Cham. Tgi che vul po suenter anc giudair ina tschaina grischuna.